

DISSERTATIO MEDICA INAUGURALIS,  
DE

# DIAETA,

Quam

FAVENTE DEO OPTIMO MAXIMO,  
RECTORE MAGNIFICENTISSIMO,  
SERENISSIMO PRINCIPE AC DOMINO,

DN. PHILIPPO WILHELMO,  
PRINCIPE BORVSSIAE, MARCHIONE BRAN-  
DENBURGICO, CETERA,

GRATIOSISSIMÆ FACULTATIS MEDICÆ CONSENSU,  
IN ACADEMIA FRIDERICIANA,  
SUB PRÆSIDIO

DN. GEORGII ERNESTI STAHL,  
MED. D. ET PROFESS. PUBL. ORDINAR.

*Dn. Patroni, Præceptoris ac Promotoris sui omni observantiæ cultu  
suspiciendi,*

PRO GRADU DOCTORIS  
obtinendo,

*die Aug. A. MDCCVIII. horis ante & pomeridianis.*

IN AUDITORIO MAJORI,  
Publicæ Eruditorum Disquisitioni exponet

JUSTUS TOTTINUS,  
Mitaviâ-Curlandus.

---

HALÆ MAGDEBURGICÆ,  
LITERIS CHRISTIANI HENCKELII, ACAD. TYP.



# VIRIS

*Conspicua dignitate, Salubriore Doctrinâ, ac meritorum in Rempub.  
gloria eminentibus.*

Magnifico, Summe & Plurimum Reverendis, Nobilissimis,  
Consultissimis atque Doctissimis

**DN. M. JOANNI ADOLPHO Sollenhagen**

Ecclesiarum in Curlandiæ & Semigalliæ, Ducatibus Superintendenti Generali & adædem S. S. Trinit. quæ Mitaviæ est, Pastori longe meritis-  
simo, fidelissimo.

**DN. JOANNI LUTHERO Bindhorst**

Ecclesiæ Candaviensis Pastori Teutonico ut vigilantissimo, ita  
meritissimo.

**DN. M. WILHELMO Steffens**

Ecclesiæ Mitaviensis Letticæ Diacono meritissimo.

**DN. CHRISTOPHORO ANTHONIO**

**Siegenhorn**

Dicafterii Ducalis Advocato Ordinario Celeberrimo.

**DN. ANTHONIO Glök**

Ejusdem Dicafterii Advocato Ordinario, & Civitatis Mitaviensis  
Secretario Dignissimo.

**DOMINIS PATRONO, AVUNCULO AC AFFINIBUS**

**Summo honore, jugi observantia & perpetuo amore  
prosequendis.**

**Inauguralem hanc Disputationem**

in signum humillimæ reverentiæ, debitæ submisionis & sinceri  
amoris, cum voto perennis Prosperitatis, & Successuum Ex-  
optatissimorum eo, quo decet, animi cultu & obsequio

*dicat atque consecrat*

**JUSTUS TOT TINUS.**



TOTTEN, J.





## PROOEMIUM.

**P**ervulgatum est Germanorum proverbium: Wer alle dinge wüſte / fõnte bald reich werden: Quod quidem uti non tam de ſcientia rerum extrâ omnem ordinem ditantium, Chryſopœia, aut theſaurorum abſconditorum revelatione, intelligunt; ſed ſimpliciùs, de qualicunque etiam opportunitatis & utilitatis, tempeſtive innotefcente præſentia, aut proximâ potentia; Ita applicant etiam, ſeu transferunt veluti ad alias res imprimis utiles, tum etiam noxias, adeò ut etiam ad ipſum negotium, quid Sanitati commodum aut noxium ſit, hoc idem applicare minime dubitent: tanquam innuentes, ſi quis ſciret, quid maximè profuturum ſit ſanitati, facilè illi operam daturum eſſe; & viciffim, quod cavendum ſciret, vitaturum. Quamvis autem in genuino ſenſu & vorum acceptione, locutio hæc proverbialis, omnimodo rectiſſimè ſeſe habeat; nempe quod ſub huiusmodi conditione talis tanquam certæ ſcientiæ, utique aliquis poſſet ſatis commodè talibus rebus potiri; non poteſt tamen ex eo æque ſubſumptio atque applicatio fieri, etiam ad ipſum factum, quod, inquam, propterea, imò tanquam hoc ipſo, qualicunque certitudine ſperatorum huiusmo-



di commodorum actualis possessio, nempe in ipsis terminis locutionum usitatarum; Wer alles dergleichen wüßte/ würde oder müste deshalb reich / gesund / ohnbeschadet/ seyn. Quamvis enim hæ locutiones de probabili, non solum potentia, sed omnino etiam vera potestate secundum legitimum ordinem fiendi, verissimæ sint, & plane recte sese habeant; quo minus tamen absolute perpetuæ veritatis compotes evadant, efficit imprimis intaustum illud Intellectus atque Voluntatis diffidium: dum scilicet multa quidem bona aut utilia esse, mortales passim satis certo sciunt & intelligunt; interim non propterea simpliciter animum illis rebus submitunt, ut easdem vero atque recto ordine impetrare cordi habeant, & vere ita uti convenit, ad illas pertendant. Non commodum nobis est, aut permittit temporis nostri opportunitas, circa distinctiones harum rerum prolixius argutari; cum quilibet discernendi compos utique facile comprehendat, quod non tam circa ipsum finem Voluntas Intellectui refragetur, quin satis cito imo vero serio, velit, quæ satis certo atque indubitate utilia ille agnoscit: sed quod vere universa difficultas proprie occupetur in mediorum ad finem talem necessariorum prompta atque seria approbatione, & vere alacriter voluntaria susceptione. Comprehendit rem uti solet brevibus verbis admodum nervose Seneca primis lineis Lib. de Vita Beata hoc ipsum maxime indicans: *Vivere beatè omnes quidem velle, sed ad pervidendum, quid beatam vitam efficiat, caligare: & recte penitus in subsequentibus, decernendum esse, asseverat, non solum quò, sed etiam quâ tendamus, in beata vitæ negotio.*



gotio; Utrumque velut dilucidatione indigere, imo verò approbatione, vix cuiquam dubium esse potest: in bonæ *sanitatis* complexu, aliquid horum perplexum esse, plerique facile consenserint; utrumque, vix pauci, primo statim intuitu, confitebuntur. Habere se verò ita rem ipsam, tunc non poterunt dissentire, quando reminiscuntur, quantus passim hominum numerus de ipsa Sanitate adeo incommodum atque male fundatum conceptum sibi fingant, ut nihil justum, æquum, æquabile atque moderatum animo proponant, sed omnia summa, imo verius omnia extrema: Ferream, imo saxeam, sanitatis constitutionem & corporis non tam durationem, quam duritiem: quæ quaslibet intemperantiæ & intemperiei ataxias, inconcussæ, imo insuperabili robore aspernetur, & non aliter, quam scopulus marinum fluctum, facile retundat. Quemadmodum autem etiam hæc ipsa res, exquisitiore æstimatione facile agnoscitur, longè plurimum insistere *mediorum* justorum sanitatis ignorantia, aut verius eorundem fastidio: ita nihil certe mirum esse debet, si in hac etiam parte passim aliud fiat, quam quod convenit, non magis Intellectus, quam perversæ Voluntatis vitio, cui, ut jam dudum Plinius conqueritur, *nihil ita, uti rerum naturæ, placet*. Hujus rei eximium exemplar cum sese nobis offerat maxime in *mediorum* ad conservandam sanitatem directe necessariorum, familiari neglectu, imo vero contemptu, tanquam illa, imprimis cum medicinæ suppetat subsidium, ut super-  
vacua, impune aspernari esset integrum, eumque errorem multorum hominum animis satis profunde inhærere, multiplex experimento perspectum habeam, placuit tanto magis thematis INAUGURALIS loco,  
A 3 DIÆ-



DIÆTÆ *ad conservandam & restaurandam sanitatem,*  
*necessarium* USUM, declarare.

Cui coepto, ut DEUS omnis ordinis atque temperantiæ fons & Author, clementissime adspiret, meque Voti mei compotem faciat, est quod humillimo animo ipsum exoro.

Th. I.

**Q**Uamlibet DIÆTA, in *generaliore* hujus nominis acceptione, complectatur justum ordinem omnium rerum *Non-naturalium*; quæ nempe non quidem simpliciter ad *existentiam*, nedum *essentiam*, bene vero ad *subsistentiam*, *conservationem* atque *durationem* corporis, inserviunt: tamen usitatio propemodum, certè familiarior, ejusdem significatus, non tam omnes promiscuè, quam veluti Κύριως, ASSUMENDA, & quæ ad horum felicem usum pertinent, tanquam magis propriè, aut certè magis propè, comprehendit: ut videlicet maxime omnium, quando *Dietæ* mentio incidit, primò mox intelligatur, *justum regimen* circa *quantitatem*, *qualitatem*, *ordinem* atque *tempus*, *ciborum* & *potuum*: & inde demum, tanquam per bonam consequentiam solum, habitus atque proportio, ad *assumpta motus* & *quietis*, *excretionum* tempestarum, quin etiam *somni* & *vigiliarum*: Imò familiariùs etiam fere *frigoris* aut *caloris* ordo, magis in comparatione ad plenum aut vacuum corpus, quàm in simpliciiori sui directæ energia in corpus, in hanc considerationem trahantur. Quamlibet autem re vera universa illa generalior comprehensio omnium rerum *non-naturalium*, justam contemplationem atque ordinationem optime mereatur; quia tamen amplius spatium, tam temporis, quàm deductionis requirit illarum solertior evolutio, quam nostræ rationes permittunt: manebimus propterea in illa arctioris ambitus acceptione, nempe *Assumendorum* imprimis commemoratione atque commendatione: reliquarum



rum autem ad hæc ipsa maximè *reflexa* consideratione, quatenus nempe *Assumendorum* maximè proportionibus, æquari debeant, ac *subordinari*.

## II.

Neque tamen etiam hoc ipso sensu arctiore sumptas res *non-naturales*, & maxime omnium ipsa *assumenda*, minutim atque singulatim pertractare, nobis proponimus; quasi nempe non solum quicquid usquam ullo modo, ullo respectu, ulla mensura circa corporis nutritionem tolerari potest, tanquam censu instituto, ad numerum exigere, in nos suscipiamus: nedum ut etiam quoquo modo *noxiorum*, indicem proferre, constitutum habeamus: sed satis nobis, imo abunde, erit, si magis *positivè*, quæ verius atque sincerius laudari, aut juxta ipsam veritatem reprobari, mereantur, declaremus. Tanto magis, cum etiam ferè sufficere arbitremur, si de illis maximè sermonem instituamus, quæ & *possunt* facilius, & *solent* proinde etiam communius, & à plurimis mortalium, in usum tales peti atque adhiberi: præ aliis, quæ non solum confveto usu rariora, sed omnino etiam paratu ac impetratu difficiliora, magis secundum *phantasiæ* incontinentiam, quam ullam speratam *utilitatem*, nedum *necessitatem*, à paucioribus, interdum, admittuntur.

## III.

Cum autem ea, quæ per os assumuntur, velut omnium maxime in ipsum sensum incurrant; imo etiam, si quidem impetus insolitus præcipuè repentinus alienarum rerum, Naturæ energiam graviter exasperet, revera maxime citò & præsentissime œconomiam vitalium motuum perturbent; placet proinde ab his initium facere, & de Diæta circa CIBORUM assumptionem, primo loco verba facere. CIBI considerantur merito, vel in ordine ad *salutarem usum*; vel ad palatum & *gustus jucunditatem*. Priore intuitu, optimus est omnium, & Naturæ non solum convenientissimus, sed etiam sufficientissimus, *viæus simplicissimus*; nempe, qui non tam ad quidquam aliud, quam *nutritionem* corporis, optimè  
cede-



cedere possit: i. e. ejusmodi partibus constet, quæ ante omnia ad sanguinem, tum etiam reliquas partes corporis, conostituendas atque sustentandas, debitam materiam suppeditare valeant. Hac de re in nostratibus quidem, jam pridem, notis, *Europæis & Asiaticis* cis Euphratem, regionibus notissima pro hoc usu fuerunt semper FRUMENTA, *triticum, Oryza, far, secale, milium, hordeum*; Imo etiam *lac*; ante omnia *vaccinum*, deinde etiam *caprillum, & ovillum*. Et hoc apud gentes, quas vulgo cultiores seu moratiores nominant. Apud alias interim, tam antiquis jam temporibus memoratum aliquid est de *Ichthyophagis*, quales recentiora tempora manifestius aperuerunt, piscibus exsiccatis, loco panis non solum, sed omnium etiam *aliorum ciborum*, utentes; sicut etiam *Africanos* quosdam nullis hujusmodi *frugibus*, sed *radicibus* peculiaribus, farinæ, & inde panis loco uti, eadem recentiores navigationes detexerunt: & similia de *Americanis* variis gentibus, experientia comprehenderunt. Sicut autem fruges illas, pro alimento humano, etiam *sufficere* posse, docent exempla hominum, solo *pane & aqua* diu sustentatorum: Ita est totum negotium tanto evidentius, quando etiam adhuc deteriore victu, *marinis exsiccatis* piscibus, & *crudis* etiam ita vorandis, remotiorum *Lapponum* totæ gentes victitant: vix alio, quàm interdum qualiscunque *ferinæ*, aut recentis etiam piscis, trusto interposito, qualia tamen singula & omnia *frugum* usu deteriora esse, nemo facile dubitaverit.

IV.

Quid, quod *fruges*, etiam solas, ad hominis victum sufficere posse, non solum exempla multorum *brutorum*, etiam *robustissimorum* demonstrent, sed, cum hæc similitudo forte minus æqua videri posset, videntur certe hoc tanto melius confirmare, multi *infantes*, qui nuda pulte ex *aqua & farina*, etiam citra *lactis* materni usum, sed mortuis matribus, *aquam* etiam potantes, nihil secius non *vitam* solum conservent, sed *commodè* etiam, & sine justa vera ulla querela. Cæterum, cum utique hic victus non facile reperturus esset assensum in-



ter valde diversam jam velut universalem *consuetudinem*; potest utique facile tolerari etiam aliorum ferculorum varietas: ubi ante omnia in considerationem veniunt CARNES. Non equidem criticorum historicorum scrinia excutiemus, *quando & quantum, carniū* esus primo cœpisse credi possit? Cum utique oblatio *Abelis*, ovibus pascendis invigilantis, verisimiliter de grege facta, & ad morem propemodum omnium victimarum (specialissimis *holocaustis* exceptis) *participationem* aliquam offerentis involverit: potest certe nobis sufficere, quod ad minimum post diluvium, & cœperit statim, & ita continuaverit *carniū usus*; ut hinc etiam sat exemplorum colligi possit, huic rei testimonium perhibentium. Quamvis etiam ante diluvium, ipsi Noacho editum mandatum, de pluribus è *mundorum* animalium coetu, quam *immundorum*, assumendis, jam aliquid altius innuere videatur: sane postquam ultima determinatio *mundorum* animalium, nulli alii velut objecto directe superstructa esse videtur, quam usui ad *esum* &c.

V.

Sicut autem *carniū* etiam, ingens utiquè est varietas; nempe, primò omnium, sub differentia animalium, aliorum *aquatilium*, aliorum *terrestrium*: (ubi à nostro foro facile secludimus ineptias, quæ *piscibus carnes* denegant, ab omnibus *physicis* æquè, ac *appellativis* rationibus, abeuntes:) Deinde sub diversitate *spissiorum* ac *tenaciorum*, & ex adverso *teneriorum* atque mitiorum; Ita valet utiquè hæc ratio longe plurimum, ad minimum *adsuetudinis* intuitu, si maximè non æquè absoluto respectu: (quandoquidem etiam *Samojedarum* infantes ipsos, non solum *equinâ*, sed *crudâ* insuper carne, quam mordicùs à membris macetatarum bestiarum avellant, satis commode vivere, & aliàs fide dignos, & ipsos *αὐτόπτες*, testes habemus: præter illud, quod de *Capitis bonæ spei* accolis, vulgo *Hotten-Dotten* in omnibus itinerariis confirmatur) utpote quo etiam varia talia, & primo usu, tolerabilia, & longo, familiaria, redduntur.



VI.

Sicut autem non solum *duriorum*, sed etiam ferè quarumlibet carniū, adhuc *crudarum*, usus & esus, in justam *Dietam* minimè venire potest; neque huc iterum trahi meretur, sive *Tartarorum* adſuetudo, ad *equinas* carnes, calore equi cursoris obiter concalefactas: nequè Inferiorum nostrorum Saxonum oblectamentum, in carnibus suillis *non coctis*, sed tamen *sule* atquè *fumo* penetratis, avide comedendis: ubi etiam *adſuetudo* non postremam partem sibi vendicat: Ita est tamen universæ propemodum *carnis* opprobrium, non postremum, quod ferè quantumcunque sensibiliter concussa sanitatis integritate, Natura humana abhorrere sentiatur à carniū usu, quin etiam sub quacunque persvasione assumptas, sensibiliter ægrius tolerare, & variis insolitis ventriculi motibus, ad assumptarum elisionem denuò veluti respectare. Quæ certè res in ipsis *acutis*, quàm soepissimè pessimi est exempli; quando nempe patientibus multiplici svasu obtrusa *juscula* non solum simplicia, sed etiam saturate *gelatinosa*, vulgò *Krafft-Suppen*/ variis cardialgiarum schematibus, tot atquè tanta incommoda incutiunt, ut Medicus harum rerum ignarus, æquè atquè omnes adſistentes, illas, ut appellant, cordis anxietates, absurdè directæ *malignitati* assignantes, non possint non variis modis aberrare: interim autem re verà etiam necessarius tranquillior successus & exitus universi morbi, ab hujusmodi ataxia adventitiâ, magis magisque gravius pervertitur.

VII.

Interim est utique etiam circà ipsam hanc præsentem rem, equidem in genere certum, quod *consuetudo* plurimum omninò valeat, imò possit: interim tamen, quando re verà undecunque sensibiliter pejushabere, aut à toleratis morbis non satis sincerè ad pristinum vigorem reverti contingit corporis œconomiam, passim non exiguam considerationem sibi deposcat hæc veluti generalis circumstantia, quod tali tempore communissimè *carniū* etiam in genere *impatiens* sit Natura.

VIII. Quem-



Quemadmodum autem, ubi hæc circumstantia *fastidii* carniū insoliti, sese manifestat; aut, cum qualicunque etiam appetitu, pro more pristino, adsumptas carnes, sensibilis *Dysphoria* subsequitur, tempestivam, circā harum rerum continuationem, circumspectionem reverā sūadet: ita est tamen etiam locus prudenti æquē, ac peritæ discretionī, quid verē in his negotiis sese prodat, & ipsis quasi sensibus offerat, ne familiare illud scandalum occasionem inde sumat, ut circā res minoris momenti Medicus vehementer commoveatur: circā veriores autem longē majoris ponderis, cœcutiat, aut conniveat, & inanibus auguriis, ejusmodi rebus, partim emergentia, partim impendentia damna imputet & assignet, quæ earundem nullam habeant culpam: veriores interim talium rerum causas æquē atque machinas, ne intelligere quidem, nedum avertere meminerit. Ita enim notissima sunt exempla, ubi ad *duriorē* victum, non solum tolerandum, sed etiam tanquam cum oblectamento appetendum, *adsuefactis*, si, certē immatura sapientia, talis tanquam *absolutē malus*, dissuadeatur, & simpliciter *mollis* substituatur, ejusmodi subjectis eo ipso adeò male consulatur, ut illa hoc ipso demum in *cruditates*, quas vocant, ventriculi, & flatulentas ventriculi ac intestinorum inquietudines, recta via procedant, imò quasi præcipites agantur.

IX.

Quæ certē res adeò non exigui est momenti, aut singularis, adeoque fortē rarioris, eventus, ut potius nimium quam familiaria occurrant ejus rei exempla, tum quando duriori eduliorum generi assuefacti, *Saxones inferiores, Westphali, Pomerani*, & ultiores *Maris Baltici* accolæ, ac vicini, inter quos etiam *Curlandiam* meam Patriam laudare possum, ad *molliores* victus simpliciter transitum faciunt: tum quando & *victui duriori*, & *motibus operesioribus* diu assuefacti, paratis ita otiosius & lautius vivendi mediis, huic rei indulgent. Ubi nempe utriusque talibus, certa impendet valetudinis suæ n



pejus mutatio, & ordinariè à primarum viarum incommodis futurarum ampliorum turbarum exordium capiens.

X.

Quâ videlicet in re, ut hoc etiam præliminari quasi loco, quod ajunt, anticipando, præcipiamus, nulla est certior regula, quam *appetitus* constantiam & *euphorie* consensum, inter se conjungere, aut certè comparare; imò in qualitercunque vacillantibus rebus, horum etiam velut experimenta capessere, & secundum illa, ante omnia tamen *euphorie*, regimen ordinare. Ubi v. g. & sanos allegare possumus, qui cœnare desvefacti, si vesperi etiam modicum, inprimis carni-um, assumant, inquietam inde noctem sentiant: quoties au-tem de gratis sibi *durioribus* cibis, ut *pernâ*, fumo & sale con-dita, quantum aliàs in prandio solent, cœnæ quoque loco comedant, nullam usquam in eade alterationem persentiscant: sed etiam modo non quotidiana sint similium exempla, qui in *chronicè* dubia valetudine, præmaturè ad mollem Diætam *ad-stricti*, ab hac ipsa pejus habeant, constante ipsis adhuc ad *du-riora* appetitu, & sola speculatione Medici damnando viso: quem interim ipsa sensibilis *euphoria* excusat, molliorum au-tem illorum pariter aperta *Dysphoria*, & ipsius ab istis appeti-tus alienatio, longè certius illa damnat.

XI.

Quid, quod in hoc negotio etiam ipse adeò *panis*, non po-stremas partes sibi vendicet; dum passim inveniuntur, non solum ventriculi, quos mollis, *triticeus*, panis, minimè satu-ret: sed etiam ipsis nauseam, & mucilaginosas cruditates pro-creet: unde etiam longe frequentior quasi scaturigo sputi in os confluens, cum fastidioso appetitus lapsu, inflatione ven-triculi, ructibus nidorosis, aut certè insipidis, & nihil acidu-lis, pullulant. Meminimus hujusmodi casus, in generoso Vi-ro, habitus & texturæ corporis non æquè robustæ, sed verius tenerioris; qui tamen cibis plane mollibus non solitus erat oble-ctari. Cum autem ipsi placuisset strictiorem quandam Diætæ rationem subire, & inprimis *aquam* pro potu ordinario ex-



periri, visum est simul, etiam *secalinum* panem dimittere, & solo triticeo uti, qui minore quantitate plus nutrire judicabatur. Persentiscebatur hinc maturè, satis exquisita incommoda post pastum, & imprimis tanquam conclusam quandam flatulentiam, minime perfunctorie molestam, quæ etiam reliquam concoctionem tanquam manifestius turbare sentiebatur, imò appetitum obtundere; Certissimè quidem *physico-morali* efficacia, dum quasi constanter & indubiè emicans, insignis illa post pastum molestia, qualemcumque metum assumptionis tempore quasi præfigurans, hoc ipso quadantenus averfari faceret totum edendi appetitum. Hariolabatur veluti ipse Patiens, quâ est prudentiâ, quod hæc mutatio diætæ, & nominatim panis, quia diutius jam aqua sine eximiis hujusmodi incommodis usus erat, in culpa esse possit: cumque ea in re consentiendi rationem sufficientem haberemus, & antequam alias medicationes tentaret, simpliciter mutationem panis *triticei* cum usitato *secalino* domestico, rectè fermentato, iterum per plusculos dies usurpare svaderemus, evanescentibus omnibus illis molestiis, sine inutilibus aliis artificiis, integritati & appetitus, & justæ concoctionis, restitutus est. Sicuti revera usus panis *secalini*, non solum *fermentando*, ut gratum acorem spiret, excitati, sed etiam *sale* ad gratum saporē conditi, non solum passim etiam delicatioribus prudentioribus, ad minimum pro alterno usu cum triticeo, placere notatur, sed etiam nunquam certè, nisi insigni abundantia, & velut abusu, ullam molestiam creare. Coeterum, quod subsidium, victus quoquo modo *durior*, etiam expectet à subordinatione *motus* corporis vegetioris, indicabimus adhuc in sequentibus.

## XII.

Valet hic certè etiam merito, jam ab antiquissimis temporibus per Hippocratem annotata *adsvetudo firmiterum* quoque alimentorum; non solum apud ipsos sanos, quorum subinde vox illa auditur: Sie können sic mit dem weichen Kalbs-Lamm-jungen Hünner-Fleisch/ Suppen-Werck/ Back-Werck/



nicht vertragen / sondern achten ein Stück gut Rindfleisch / Schin-  
 ken / Stock-Fisch / Sauer-Kraut 2c. höher / als alles derglei-  
 chen 2c. sed etiam ipsis adeo ægris, chronicas in primis mo-  
 lestias sentientibus. imo subinde concurrentibus ipsis incom-  
 mode mollioris victus occasionibus. Unde circa has res lo-  
 cum habet Medici prudentia. Placet historiam de hac re  
 breviter memorare. Vir nobilis quinquagenario major, her-  
 nia scrotali valdè incommodè habens, animo de reliquo &  
 corpore sic satis firmus, auscultat svasui amicorum & consve-  
 tis pollicitationibus vagabundi Herniotomi, ut sectioni se sub-  
 mitteret. Imperitus autem operator exsecat cum testiculo &  
 vaginali illo sacculo, etiam frustum intestini. Ubi quid perfe-  
 cerit persentiscit, causatus in oppido, è cujus nundinis ad pa-  
 tientem in pagum propinquum exierat, petenda sibi quæ-  
 dam, relinquit mature Patientem non solum, sed totum illum  
 districtum. Emanente hoc, & jam malum Patienti & famili-  
 aribus præfagiente animo, advocatus ex urbe Chirur-  
 gus ordinarius, religata parte, reperit liquidas fœces, &  
 intestinum resectum: Vocantur eximii nominis Medici tres;  
 indicant non periculum solum, sed tanquam certum damnum  
 vitæ, primo conjugì & agnatis, tandem etiam, urgenti decla-  
 rationem, Patienti, piæ maxime animi præparationis ergò.  
 Præscribunt autem mollem atque tenuem victum. Patiens  
 animo satis firmò exspectat exitum, Medici, ut conclamata spe,  
 in primis longius habitantes, discedunt; tertium, virum etiam  
 alias præsentis animi nomine suo tempore notum, D. Keilin-  
 gium, urget Patiens quæstione, annon sibi permitti possit, ut  
 gratioribus sibi cibis *durioribus* uteretur; argumento etiam  
 illo, si utique moriendum sibi sit, hoc parum fore quod in du-  
 bium adduci debeat: consentit Medicus. Parari sibi jubet  
 Patiens patinam brassicæ muriaticæ cum botulo affo, &, tan-  
 quam famelicus, intemperanter devorat; cum jam ultra qua-  
 tuor dies valdè parum interquievisset, post hanc saturationem  
 ita refectus & alacris, ut adstantes etiam mente vacillare suspi-  
 carentur, petit silentium, quia dormiendi aliquod desiderium  
 per-



persentisceret : obdormiscit, & magis magisque profunde quidem, sed tamen cum libera & æquali respiratione, & adeo usitato sibi somno simili, ut etiam antiquo suo more sterneret. Expergefactus, post aliquot horas, mirè alacris, religat ipse locum sectionis & inspicit, quantum potest accuratius, ut que observationis suæ certior fieret, vocari etiam Chirurgum jubet, qui e domo huc usque non discesserat. Deprehendit hic quoque, perspicaci inspectione atque visitatione, quod intestinum labio vulneris agglutinatum cum eo coalescat. Brevis, absolvitur successive hic coalitus cum labiis vulneris ingvinalis, manet in posterum intestini cavitas aperta, & fecibus per hunc locum exitus, ut patiens post octo demum ab eo tempore annos vitam cum morte commutârit.

### XIII.

Post *cibus* proxima utique est ratio *potus*. Conjecit hujus antiquiorem simplicitatem, consuetudo, imò licentia posteritatis, in varie turbulentos successus. Cum enim Veteribus, à quibus aliqua circà medicas intentiones monumenta ad nos pervenerunt, vel simplex *aqua*, vel simpliciter cum alimentolis leviter *decocta*, vel *lac*, in primis *tenue*, vel denique *vinum*, aut *hydromel* seu *mulsum*, in usu essent, processit sive posterorum, sive ad minimum aliorum, curiositas, (sine dubio e fortuita observatione) ad *fermentescentes* magis, quam *fermentatos*, potus, e granorum censu, nempe vulgo dictas *cerevisias*. Meritò dico *cerevisias*; cum insignis illa *varietas* horum potuum, quam maxime varie sese habens ad tolerantiam hominum, notissima sit: Incommoda quæ hæc potus genera involvunt, sunt antè omnia, partim manifestò *ventriculi* & *primarum viarum* perturbationes, *flatulentæ*, eoque ipso *tensivæ*, *contentiosæ*, *spasticæ*, *torminosæ*: partim *caput* turbantes, *gravantes*, & *obnubilantes*, *siccitatem oris*, *ardorem faucium*, *sitim* ulteriorem, *ardorem* totius corporis, *respirationis angustias*, in primis tamen primo loco dictas *flatulentas* illas, *tensivas* formantes.



XIV.

Jam, cum utique *ciborum* assumptio, inprimis magis magisque *solidiorum*, etiam sufficientem *dilutionem* postulet; non solum pro decente ipsorum resolutione, sed etiam expedita distributione, imo etiam secretionibus & excretionibus debitis recte absolvendis: non inanis certe est consideratio, quid huic scopo commodissime omnium adhiberi possit, imo debeat? Tanto magis, cum quotidiana propemodum occurrant exempla, quod, de reliquo minimè infirmos, sed satis facile tolerabilibus laboribus pares, solius *potus* minus congruentis molestia, sensibiliter turbare, atque prægravare valeat. Quod itaque hanc etiam rem concernit, sunt utique præcipuæ considerationis talia potulenta, quæ quidem *fermentationem* cibariam moderatè promovere potius, quam retundere possint: interim nec intempestivè augere, nec etiam alienis illis, inprimis *inebriativis*, aut *narcoticis*, aut *inviscantibus*, incommodis, perturbare valeant.

XV.

Secundùm has intentiones, sicut equidem *Aqua*, *dilutioni* eximiè satisfacit: adeoque etiam *secretiones* & *excretiones*, non solum non impedit, sed etiam, nempè è materiæ nudâ ratione, potius promovet: eoque ipso intuitu adsvetis, aut veriùs forte, *non aliter adsvectis*, satis commode quadrat: ita est tamen rationi satis consentaneum, quod omnino etiam aqua, *alimentaribus* particulis etiam aliis jamtum sensibiliter imbuta, veluti propius, disposita sit ad magis acceptabilem nutritioni corporis & quicquid ad illam tendit, paratiorem conditionem.

XVI.

Hoc ipso intuitu certè primum propemodum locum sibi vendicat, ipsum *Lac*. Quod, cum & solidescens nutriti, & satis sufficientis diluentis atque potulenti, vices explere possit, non ineptè certè propterea tum ab antiquis temporibus in hunc usum tractum & adhibitum est: tum per ipsa adhuc hodierna tempora, huic eidem fini passim adhibetur: in-

primis



primis portione sui spissiore, *caseoso-butyrosa* jam orbatum, *cremore* nempè suo, *Milch-Raum/ Sahne/ oder Schmandt*: quale vulgò abgenommene oder blaue *Milch* appellant. Sicut etiam de *Tartaris* hodiè dictis, vulgò memorant itinerum descriptiones, quod *equino* lacte sitim restringere soleant. Veluti non solum de *infantibus*, sed etiam quorumlibet *viviparorum* animantium pullis notum est, quod *Lac* ipsis per teneriorem ætatem non solum in *potum*, sed etiam in ipsum cibum sufficiat.

## XVII.

Habent autem etiam arte facti *potus*, omnino usus non contemnendos, dummodo partim propria ipsorum bonitas, partim *adsuetudo* individualis, in considerationem decentem veniant. *Consistentiam* quod attinet, est illa utique laudabilior, quæ *alimentosum* quidem quiddam in se contineat, interim ad hujusmodi effectum ferè benè atque promptè dispositum: nec adeo æquè ad *corruptelas*, vel *viscosas*, vel *acres*, vel *putridas*, proclive. Sunt autem hujus generis, *mediæ* inquam constitutionis, simplicius parati potus *hordeacei*, *moderatè fermentescentes*, vulgo *cerevisiæ* nomine noti. Veteres nudo *decocto* hordei, etiam *crudi*, acquieverunt; quod inprimis in calidioribus regionibus ad *acidulum* saporem disponere utile duxerunt, per *acetum* moderate admixtum, *ptisanæ* nomine. Posteriores, & inprimis sub diverso coelo viventes, ut potum hujus generis in copiâ parare, & verisimiliter, ut à quotidiano reparandi labore superfedere liceret: imò probabilissimè forte omnium, qualiscunque etiam gratioris *saporis* ergo, instituerunt, non simpliciter *decoctum* ejusmodi spissius, sed *fermentatione* alteratum, *attenuatum*, & *acuatum*, adornare. Quamvis etiam huic rei favisse, aut viam stravisse videri possit, incommodi illius correctio, quod à *crudi* hordei nuda decoctione resultat, *mucilaginosæ*, ingratoris, & minus sapidæ, consistentiæ. Ex his autem, quod sanè mirum, propemodùm oppidatim quadantenus *differentibus* *cerevisiis*, pro *simpliciter potulento* usu, sunt ante omnia



meliores illæ, quæ quidem *dilutiores*, adeoque nequè *ventriculo*, neque *capiti* facile molestæ, *sitim* ita sedare, & chylum bene *diluere* valent: interim illo *fermentationis* gradu gaudent, ut & *lingvam* gratius feriant, & concoctionem, *lenissima fermentescentia*, potius sustentent, atque juvent, quam turbent, excessu aut defectu: & ipsa illa placidissima *acerbitate*, tanto facilius etiam iterum ad *excretionem*, inprimis *diureticam*, tum etiam *alvinam*, inclinent. Quales conditiones quæcunque cerevisia non possidet, sed vel *fatua* est, non tam gustui, verum subtilissimo tactui lingvæ, (sine *acerbitate* illa subtili *fremebunda*, quam Galli vocabulo *picquant*, *picqueure*, designant, Germanis *das stumpff / weich / schaal / wie Dehl / schmecket / nicht auf der Zungen Sp'ge pikelt i. e. bisselt / morsicat*,) revera neque cuiquam sapit, nec etiam laudabilis est.

### XVIII.

Qui verò *potûs*, non veri sui *finis* ergo, nempe *sitis*, atque *dilutionis* maximè causa, æstimant, sed *saporis*, imò *inebriativæ* turbulentia, (quod illi *exhilarationem* appellant,) nomine affectant & amant, cum illis nobis non est sermo: tantò minùs, cum cerevisiæ, hujusmodi heteroclitis effectibus pares, directis illis *potulentis* usibus tantò minùs quadrent: & ferè duplices, planè peculiares, circumstantias involvant, ut vel *labore* atque *corporis agitationibus*, incommoda quæ post se trahunt, non tam discutienda veniant, quam excutienda: vel otio longo, atque *somno diuturno*, iterum superandæ: sed communiter posteriore hoc casu, cum diuturnioribus *fastidiis*, *gravationibus*, *langvoribus*. Tantò magis, cum hujusmodi cerevisiarum apparatus, etiam pro condimento, tam *saporis*, quam durabilitatis, & *inebriativi* effectus, additamenta requirat, inprimis *lupulum*; à simplicis potulentæ utilitatis scopo, prorsus in diversum tendentem.

### XIX.

Illud, quod in hoc negotio curiosiorem quadantenùs considerationem mereatur, est illa primo intuitu veluti præpo-  
stera



stera seu inversa Consuetudo: dum, *Europæi* ad minimum, calidius clima inhabitantes, *calidioribus potibus*, non solum *vinosis*, sed etiam *generosioribus*, gaudent: *Frigidioris* cœli verò subditi, *spissioribus* non solum familiarius utuntur, sed etiam communiter commodius ab illis habent, quam à *vinò*: cum utique verosimilius videatur, *frigidi* cœli molestiis, & *spissiori aëri* atque sanguini, consultius opponi, & *tenuiores*, & *attenuantes* potus, & vicissim. Sed præter illud, quod quorumlibet talium climatum incolæ, & numero longe plurimi, & sanitate atque vivacitate maxime conspicui, longe consultius utuntur simplicissimo potu, *aqua*: minime ita absona est etiam reliqua illa *artificialium* potuum, sub differentibus illis climatibus ratio: siquidem *tenuis* potus, sanguinem commovere apti, securius usurpantur ibi, ubi *transpirationi*, & reliquæ etiam *liberæ agitationi* sanguinis, liberior atque constantior est locus: dum ex adverso, ibi, ubi per alterationes aëris aut ipsam spissitudinem Sanguinis, *commotiones* ejus minus securæ sunt, etiam incitamenta vel nulla, vel minora, locum habere debent.

XX.

Sicut autem & *cibi simplices*, & *potus maxime temperatiores*, quam maximè conveniunt, atque Naturæ conferunt: Imò etiam ex ipsis cibus, quadantenus potius *firmitioris*, quam planè *mollis*, consistentiæ: ita subservire tamen debet, tam illis, quam reliquis illorum successibus & effectibus, *motus ipse corporis* proportionatus, & quietis quidem justæ alternatio: Interim tamen segnis atque desidis *otii* evitatio.

XXI.

Habet certè non simplicem, sed planè multiplicem usum, alacritas & agilitas *MOTORIA*, in tota œconomia humana. Præter illud enim, quod ipsum etiam *animum* magis veluti excitat, & *inertiam* ab illo depellit; reddit etiam ipsum *corpus* magis magisque *habile*: Adjuvat, prætereà, *distributionem* facilem & expeditam nutritiorum *humorum*: promo-



vet expeditiorem circuitum sanguinis: faciliat hoc ipso se-  
cessiones ex ipso, heterogenearum rerum, seu *secretiones* &  
*excretiones*: imò verò, *consumit* etiam sensim nimium san-  
guinem, & locum ita præbet *recentis* novæ subministrati-  
oni. Antè omnia, est certè non solum *utilitas* præcipua, sed omni-  
no *necessitas* motus corporis, eximia, in debita *fluxilitate*  
*sanguinis* conservanda, ne ille nimia *spissitudine*, motui quasi  
refractorius, si non æque juxta vulgares opiniones veras *stases*  
& *obstructiones* ita temere incurrat: tamen plures, & ultra  
communem ordinem etiam *auctiores*, *tonicæ transpressionis*  
contentiones efflagitet: quæ partim molestias insolitas indu-  
cunt, partim ab inutilitate non magis sui præsentia quam subinde  
sensibili vehementia, multis mortalibus imponunt, ut pro pe-  
culiaribus *directis morbis* illos intueantur.

XXII.

Sanè verò, sicut hæc *subordinatio* debita voluntariorum  
*motuum*, ad largiorem assumptionem *ciborum*, maxime vero  
ad incommoda, corpus passim ab his initiis corripientia, plus  
valet, quam *ars*, & directa subsidia, *Medica*; ita meretur ad  
animum decenter revocari, etiam altera in hoc genere, vera fa-  
tis accerta, conditio: quod nempe etiam sæpenumero artis  
subsidia quæcunque, re vera etiam in hoc genere inania sint &  
impotentia, nisi cum ipsis *motus voluntarii* conveniens con-  
cursus rectè conspiret, & illis verè subsidia atque suppetias  
ferat. Quæ certe res longe plus utilitatis, imò ausim dicere ne-  
cessitatis habet, ut memori mente teneatur; cum nequaquam  
ita rarò etiam bonis de reliquo *medicamenti* successus exop-  
tatus non tam aliunde desit, quam ex hoc præcipue latere, ne-  
glecti *subsidii motus necessarii, localis, voluntarii*: qui *invo-*  
*luntarium* seu spontaneum, *vitalem*, tam *circuli* & *attenuatio-*  
*nis* sanguinis, quam *secretionis* & *excretionis* humorum, com-  
modius & liberalius succedere faciat.

XXIII.

Quamvis autem defectus hujus *motus*, multum negotii  
objiciat tum *fæminino* passim sexui, inter otiosiores, aut delica-  
tiores



tiores: tum inter mares, *litteratis sedentariis*, & aliis qui e vi-  
tæ genere agiliore, seu laboriosiore, ad indulgentiorem, & ut  
ipsi interpretantur, tranquilliorē transitum faciunt, die sich  
zu Ruhe setzen/und forthin ihrem Leibe etwas zu gute thun wollen:  
conferentibus maximè symbolum suum, tum *victu pleniore &*  
*intemperantiore* tum animi pathematibus: est tamen etiam  
necessarius, prudens atque decens *modus*: Siquidem in-  
hoc etiam sæpe offenditur, dum præscripto ejusmodi Patienti-  
bus largiore motu, illi mensuram nullam servant, sed *immodice*,  
*subito simul & semel*, *violentis* agitationibus corporis incum-  
bunt, sine *anni & temporis, tempestatum, plenitudinis* aut *le-  
vitatis* corporis, & imprimis *abundantiæ humorum* ulla distin-  
ctione, & secundum hanc habità proportionis ratione.

XXIV.

Quæ res plura incommoda sub se complectitur, non levi-  
densia; Primo enim, contingit non ita rarissimè, ut simul & se-  
mel, aut nimis etiam diu, *valdè exagitatus* sanguis, nimium  
velociter expandatur, *restagnationes* importuniores,  
imò *stases* ita concipiat: aut ab his incitamentis importunis,  
ferociore *regurgitationes* versus regiones certorum emun-  
ctoriorum, pertinaciter suscipiantur: à quibus omnibus atque  
singulis rebus, *dolores, exæstuationes, inflammationes; Febres*,  
imò etiam *eruptiones* sanguinis incontinentiores, occasionem  
sumunt. Unde utique hæc etiam pars ad bonam *Dietam* perti-  
nens, optimè rationi atque proportioni superstruenda venit.

XXV.

Minime vero in hac classe silentio simpliciter involvere  
convenit, peculiaria illa genera *motus* corporis, quæ etiam *de-  
bilibus, & graviter periclitantibus, phthysicis, atque Hæcticis, Ve-  
tustas* quidem in *navigatione*: Inter recentissimos autem, in-  
primis *Sydenham*, in *equitatione*, quin etiam *vectura* succussa-  
toria, passim destinaverunt, imò promiserunt: confidentissi-  
mo certè *Sydenhamii* asserto, qui *equitationem* tam certo  
*Pbthysi* salutarem esse affirmat, quam *Febrî Tertianæ* sit *China*  
*Chine*. Quod quidem, licet eadem fiducia confirmare non au-



simus, insignem tamen esse ejus efficaciam, ne luculenta quidem etiam exempla defunt.

XXVI.

*Quietis* vicissitudo, prudenter etiam instruenda & in usum trahenda venit, post usurpatos ipsos quoque Motus. Tum, nemox, imò immediate *post* insignes Motus, aut *inter* ipsos eosdem, segni quieti statim locus concedatur: vel pedibus iter facientium nota observatione, qui in medio itineris, otiosè & diutius desidendo, repentinam quandam insignem *Fatigationem* ita incurrunt, quæ illis, quod reliquum est viæ, tanto molestius & laboriosius reddat: aut ad minimum utique, ita ipsos prægravet, ut majore cum animi & corporis contentione, majorem alacritatem iterum consequi necesse habeant. Inprimis autem est hujus modi inconueniens regimen admodum familiariter in culpa, ut posteris diebus, sic affecti, *contusorium* illum sensum in artubus percipientes, qui etiam exquisitè sanis, saltem non assuetis, post alacriores atque longiores ambulationes evenit, *fatigationem* hujusmodi, imo veram *segnitiem*, *virium defectui*, atque *destitutioni*, imprudentius imputantes tanto magis imposterum abhorreant ab hujusmodi corporis exercitationum usibus amplius *repetendis*.

XXVII.

Quemadmodum autem tam motus *repentini* excessus, quam quietis diuturna, imo *assidua* continuatio, corpori variis modis molestiam faceffunt, ita fit hoc tanto certius in iis, qui contrariæ rationi jam diutius *adsueverunt*; atque hac ratione, quod vulgo dicitur, ab *uno extremo in alterum* temere transitum faciunt. Excepto verò repentino illo, minus utique ita commodo, mutationis incommodo. si quid liberalius atque largius fieri debeat, dignum omnino est notatu, quod præstet plurimum potius *motui indulgere*, quam *quieti* nimix incumbere. Ubi omnino decentem contemplationem meretur circumstantia illa notissima, quod *vegetiore* motu, corpus non solum *agilius*, sed etiam *firmius* reddatur: imò *vires* ipsæ motorix, tantum abest, ut ita deperdantur atque consumantur, ut potius, pruden-



te motionum alacriorum usu, acquirantur veluti & augeantur. Quorum rerum universalium contrarium re verà evenit à quietis abusu, nempe & *inhabilitas*, alibi *flaccida*, alibi *rigida*, corporis: *mollities* autem *fibrarum* atque *laxitas* virium præter eà torpor, imo velut universalis *enervatio* atque *gravitas* corporis: *socordia* verò, *fastidium*, *somnolentia* animi, & varia mala consilia *otiosis* speculationibus vestigia legentia: sicut etiam *motus* corporis tolerabiles, *bonus appetitus*; pigritiam, fastidium: illos, consumptio prioris, & inde reparatio recentis, sanguinis, insequitur: desidia, depravatio utriusque: illos promptiores & expeditiores *secretiones* & *excretiones* heterogeneorum; hanc, harum & rerum retardatio atque neglectus.

### XXV III.

*Aëris* temperamentum, quin multum in regimine Diætetico sibi deposcat, nemo facile dubitaverit: sunt autem præcipuæ ejus conditiones, quibus nocet, (præter simplicem *excessum* insignem in quacunque etiam sic dictarum *primarum qualitatum*,) *frigoris* præcipuè & *humiditatis* incommoda. *Vitam stabulari in calido & humido*, notum est solenne antiquitatis dictærum. Cui tamen præjudicium adferre videtur altera ejusdem scholæ adfertio, quod *humidus calor* sit architectus *putredinis*: hæc vero non magis fatelles, quam carnifex, ipsius *mortis*. Si tamen posterius hoc accipiatur, uti vere ab illis sumptum animadvertitur, de *excessu humidi* caloris, facile meretur excusationem. *Frigus*, nisi prorsus *intemperans*, directè & simpliciter, corpori tam eximiè noxium non esse, benè vero *humidum* frigus, luculenta exempla monstrant. Tanto magis, cum *Frigus*, (iterum dico, non penitus enorme) faciliorem temperiem admittat, à prudente moderamine *voluntarii motus*: cujus nempe effectus præcipue, *frigoris* effectibus contrarii sentiuntur. Ast *humidum* frigus, cum simul *partium* robur labefactet, & enervet, tanto pejus utiquè est, & potentioris ad nocendum energiae. Unde etiam ipso minore sui gradu, gravius corpus afficit, quam siccum, notabilius majore gradu: adeoque etiam per *æstatem* coortæ, *frigida humida*  
aëris



aeris intemperies, longè magis turbant corpus, quam *hyemes* ipsæ solent.

XXIX.

Præcipuam tamen nocendi energiam in corpus humanum, exserit *repentina* maxime mutatio, seu transitus *calidi* corporis in ipsum *frigus*. Ubi *cum calor* sanguinem *expansione* afficiat, *refrigerationes* citò supervenientes, *regurgitationem* ejus ad intimiora causantur: aut ad minimum *contentiones* inter appulsum illum intrinsecum, & externum talem veluti stimulum *repressorium*: inter quos mutuos conatus ac renisus, *arctatus* sanguis, *stases* & *coagulationes* incurrere potest; tanto magis, si *coagulatoria* energia *frigoris* actu ad ipsum penetret: partes verò contentiosis illis tensionibus atquè pressionibus sensibiliiores redditæ, dolores ita experiuntur.

XXX.

Quamlibet autem *Adſuetudo* longa, ante omnia verò tempeſtiva, monſtroſas quaſi, certè ſpectabiles, heteroclites etiam circa hanc rem, producat: ſicut in *Septentrione* noſtro, à mea jam *Curlandiâ*, per *Littuanos* & ultra, etiam pueris notum eſt ſpectaculum, quomodo ruſtici, è publicis balneis, toti æſtuentes ac rubentes, non ſolum æſtate in *profluenteſ* aquas, ſed ipſa *hyeme* in mediam *nivem*, corpora ſua projiciant & immergant, non ſolum ſinè damno aliquo, ſed, ut ipſi fere laudant, cum inſignis *alacritatis* conſecutione: Conſtat tamen inter omnes mortales, quod actualis refrigeratio corporis, qua inquam hoc ita afficitur, ut ipſe Patiens non tam frigere, quam ſolum ad ſenſum *frigeſcere* ſe percipiat, nunquam ſine ulterioribus ſenſibilioribus peioribus conſecutionibus decedat, quoties talis intemperies corpori, vel aliunde, vel inprimis ab aliquo morbo, *ſenſibili*ori, ſupervenit: inprimis, ſi mutatio ſit *repentina*: & maxime à pariter ſenſibili calore.

XXXI.

Minimè verò negandum eſt, quod non parum etiam  
ad



ad summam harum rerum valeat longa *Consuetudo*, imò veluti connata. Interim est tamen etiam illud propemodum certum, quod, qui *frigori* adſveti ſunt, non tam inſigniter perturbentur, nedum lædantur à *calore*, quàm contrà : ſine dubio propterea, quia multo, maxime verò veluti perenni, frigidiori aëri adſveti, etiam propemodum ( non quidem à *frigoris* quacunque efficacia, ſed potius vera atque juſta naturæ, corpus ſuum recte munientis, *alacritate* ac *energia* conſtantiore, ) *firmiora* habent corpora, & *animi* etiam mores, ad *tolerantiam* magis formatos : dum à *caloris*, non tam exceſſu, quàm *prædominio*, corpus æquè ac animus, vel *enervatur* magis ; vel *faſtidio* oneratur hic, illud tenuius atque minus evadit : utrumque verò, *phyſicè* & *moraliter*, *ſenſibilius* redditur.

## XXXII.

Habet autem hæc conſideratio præcipuum locum, tum in *habitationibus*, tum etiam alia multiplici obverſatione ; dum vulgo quoque ſatis notum eſt, non ſolum *ventis* in genere, moderatis, expoſitas atque pervias habitationes, *ſalubriores* eſſe ; ſed in ſpecie quoque *humido* multo vaporis ac halitui obnoxias, *inſalubres*. Quo nomine itaque damnantur habitationes ad loca *paluſtria*, aut undecunque tandem inſigniter *humefcentia*. Sicut in *tenerioribus*, *ſenſibilioribus*, aut inſigniter *valetudinariis*, ſolertius animum advertentibus, obſervare licebit, quod habitationes in *infima* ædium conſignatione, inprimis autem ubi fundus ſubterraneus admodum *humidus* ſubeſt, ordinariè peſſimè ferant : ſenſibiliter autem melius habere notentur, quando in *altioribus*, liberi aëri patentibus, conclavibus, ſtationem ſuam collocant. Adeò certe, ut hæc circumſtantia, ſi modo correctio locum inveniat in talium hominum *Dieta* ordinanda revera non poſtremum locum ſibi vendicet, aut leve momentum ſub ſe complectatur : adeoque omni modo in hujusmodi conſultatione in conſiderationem trahi debeat. Cæterum autem vitari utique debent, quantum uſquam fieri poteſt, tum



omnis inusitata, tum *repentina* frigoris & caloris, inprimis autem humiditatis, *mutatio* : nempe *siccioris* aëris in *humidior*em, nisi quidem *ventus* liberius concurrens, ut in marinis profectionibus, aliquod temperamentum adferat.

XXXIII.

Neque verò silentio involvenda venit, res, jam inde ab antiquis temporibus, & ab ipso maxime *Hippocrate* notata & indicata, de *salutari mutatione aëris*, ex integro aliquo *districtu*, in alium transeundo. Quantumlibet enim in hujusmodi cœpto non postremum locum sibi vendicet ipsa *itineris* ratio, seu *motûs corporis* per itinera, energia: simulque *animi* major libertas & exhilaratio, quæ in ejusmodi *morbis*, quibus hoc præsidium quàm maxime destinatur, *chronicis*, utiquæ non ultimæ est considerationis: Non est tamen ullum dubium, quin deterioris *aëris*, si quis Patiens cum tali, præter reliquum suum morbum, colluctatur, permutatio cum meliore, revera etiam haud parum utilitatis patienti foenerari possit.

XXXIV.

De *aëre*, *alienis* peculiaribus halitibus alterato, minus est dubii, quomodo vel ille nocere possit, vel mutatio ejus utilis, imò aliquando necessaria existere. Illud autem omnino tantò magis, quando Patientes vel in genere, jamjam sunt *valetudinarii*: vel specialissimè in talibus locis malè habent, quæ illis aëris inquinamentis liberius exposita sint. Quo nempe loco mentionem injicere licet ejusmodi locorum, in quibus *carbones fossiles* usurpari solent, & aërem halitibus suis largiùs imbuere. De quibus, licet vulgo timeatur, quod *pectori* multum periculi minentur: non tamen observatur æque experientia huic speculationi suffragari: dum inprimis homines, qui velut inter medios hujusmodi vapores versantur, operarii varii cum suo famulitio, nihil inde effectû digni incommodi, nedum damni, pa-sim incurrere observantur: illud autem minimè dubitare sinit eadem experientia, quod illis, qui-



quibus jam violati sunt *pulmones*, hujusmodi vapores, sensibiles exacerbationes incutere valeant, adeoque longè securius sit, illas evitare aut mutare, atque adeo in puriorem aerem commigrare, aut secùs periculum experiri.

XXXV.

SOMNI & VIGILIARVM tempestivæ alternationes, quantum negotio sanitatis conferant, nemo puto facilè ignoraverit. Interim, sicuti tempestivus atque temperatus *somnus*, non corpus solùm, seu *vires*, egregie refocillat, sed & *animum* alacriorem, post intentas cogitationes, reddit: ita nihilo tamen etiam minùs notum est, quod *nimum somno* indulgere, ut *animum* ante omnia *torpidum* atque *socordem* reddat, ita *corpus* etiam enervet, *laxum* atque *grave* veluti efficiat: adeò ut inde etiam *subtumidus* aspectus, & non sincerè sana, *turgida* magis, quam *εὐσχετος*, nedum pinguis, corporis habitus discrasia inde resultet: Sicut etiam *neglectus excretionum* debitarum, *nimio somno* familiarissimè vestigia legens, è suo quoque latere sanitati nihil nisi incommoda adfert. Unde quidem debitum *moderamen* atquè proportionem inter vigiliis atquè somnum, observare, multis modis utilissimum est. Sufficiunt autem 7. ad 8. horæ, *adultis*: minorenibus autem non æquè, sed *plures* his concedendæ, inprimis pro indolis varietate, & judiciosa æstimatione tolerantia.

XXXVI.

Nec etiam æquè absolutè valet communis illa regula, de *vigiliis matutinis*, & Germanorum illud: *Morgenstund hat Gold im Mund*. Cum enim omnibus modis verisimilius sit, quod hæc ordinatio initium suum sumserit potius à *civili* circumstantia, minoris perturbationis per strepitum discursantium, & conversationis civilis, quam à *physicâ* quacunquè vera corporis ratione: quandoquidem re vera præmaturè à somno exitatus homo, ordinarie *torpidior* est, atquè *fastidiosior*: non est certè ulla verior mensura somni, nisi quando homo legitimè judicari potest *edormivisse*: unde



etiam non tam æquè valde tempeſtiva poſt cœnam ſomnum capeſſendi, & deinde valde manè ſurgendi ratio, abſolutam quamcunquè prærogativam meretur.

XXXVII.

Interim fundamentum hujus etiam rei, non poſtremum, ſitum utiquè eſt uno loco in *Conſuetudine*: altero, in reliqua ipſius *indolis* alacritate atquè dexteritate: de quâ certe, poſt ſupremum tamen fundamentum, Divinam Benedictionem, eximiè valet effatum *Pſalmi*: *Fruſtra eſſe ſummo mane ſurgere*; ſicut etiam in *tardum ſedendo* tempus proſequi: cum, quibus placitum eſt, Deus, (etiam per ipſam bonam indolem & ingenium capax,) largiatur, quod juvet, (licet non *dormiendo*,) tamen *dormientibus*. Unde nulla certior in hoc genere menſura eſt, niſi, à priori, evitatio *nimii torporis* potius, quam *ſoporis*: à poſteriori verò, obſervatio atquè proſecutio *euphorix*: ſiquidem multi dantur ejuſmodi homines, quibus expeditius eſt, diutius poſt cœnam *vigilare*, & conticeſcente ſtrepitu diurno, adhuc aliquid perficere, matutinum autem maxime ſomnum & profundiffimum experiri, & gratiſſimum: dum alii diverſo modo affecti, etiam in hoc genere ſuo mori melius relinquuntur.

XXXVIII.

*Pomeridianus* etiam ſomnus, paſſim in quæſtionem venit: ſed proſectò abſurdum eſt etiam in hoc genere *unam* firmam regulam & præceptum, omnibus præſcribere: Cum enim non ſolum temperamenta & *habitus corporis*, tantò magis autem *animi*, utique varient; ſed etiam *adſuetudines* plurimum proſectò, non ſolum poſſint, ſed etiam jure ſuo ſibi vendicent: Non poteſt utiquè tota hæc res tam arctis cancel-  
lis includi, & ſimpliciter uno eodemquè ambitu comprehendi. Securiffima omnium via eſt, obſervatio *euphorix*: Omnino tamen, evitatio voluntariæ & quaſi frivolæ *adſuetudinis*, ſi nihil ſvadere videatur, nedum urgere. Antè omniâ verò, his, qui indole ſunt alacriore, frivolæ *adſuetudo diurni ſomni*, minus convenit, inprimis ſi neque *fatigatio* corporea,  
nec



nec *oppletio* cibaria, aliquid postulare videatur: qualia tamen, uti non quotidiana sunt, ita meritò cavendum est, ne mox ab una tali, quantumcunque iustiori, occasione, transitus deinde suscipiatur ad quotidianas talium coëptorum *prosecutiones*, ad quas videlicet facillime proclivem sese ostendet natura, si ipsi temere mos geratur. Unde hic etiam *metiri se quemquē suo modulo ac pede verum est.*

XXXIX.

EX ANIMI PATHEMATIBUS, gravissima in corpus, & præsentissime, redundare incommoda, perturbationes, imò damna sanitatis atquē vitalis energiæ, vix quisquam est qui ignoret. Cum autem vulgaris enumeratio horum, non tam satis exquisitè exhaurire videatur universam horum familiam, sed, minùs exactè, solis illis enormibus, & ab omnibus quidem hominibus accusatis, apud omnes tamen propemodum usitatis, insistere; *Iracundie, terrori, timori, mœreri, anxie curæ & solitudini*, quin tandem deniquè *nausæ & fastidio, desiderio* anxio & indefinenti: Videtur e re ipsius veritatis fore, si non tam solum hæc notiora, dignitati suæ relinquantur, imò quam maximè asserantur: verum etiam alia quædam, minus vulgo directè, & velut ex ipso primo aspectu, observata & agnita, interim magnæ in hoc genere efficacisë, verà talia *animi pathemata*, malè fundatis *opinionibus & æstimationibus* superstrueta, multas, assiduas, miras, turbas corporis œconomiæ objicientia, etiam condignè notentur.

XL.

De vulgaribus certè illis notior propemodum est res, quam ut illi prolixè illustrandæ operam dare necesse videatur, Quis enim non vel statim commemorat, vel præsentissimis experimentis percipit, quod utiquè *iracundia*, atquē *terror*, ipsis illis *momentis*, quibus in animum admittuntur, etiam *primarium* generalissimum actum *vitalem*, *cordis motum*, circuli sanguinis rectorem, certissime turbent, & incommode agitent: simul vero etiam *tonicos* corporis motus



sensibilissimè percellant, ut mediantibus etiam illis, aditus sanguinis in partes corporis diversimodè reprimatur, adeoque duplici hujusmodi perversione, œconomiae corporis erroneæ commotiones incutiantur. Ubi inprimis alibi assiduè adhærentes, alibi trepidè recurrentes, ut animi, ita ipsius etiam corporis, tales *tumultus*, non modo *multa*, sed aliquando etiam *gravia*, inprimis autem magis magisque *prompta* atquè *repentina*, objiciunt *vitalium motuum* scandala: in *pulsus* negotio, ad *syncopticas asphyxias* usquè: in *toni* actu, a *tremoribus* trepidis, inò *impotentia* voluntariorum motuum timidissima, ad *convulsivas* usquè vehementissimas contentiones.

#### XL I.

Puto autem posse nos excusari à diffusiore harum rerum accusatione, adeoque necessariâ etiam dehortatione, ab earundem temerario abusu. Majori vero sine dubio jure mentionem faciemus *duorum* tanquam *compositorum* de classe hac, *pathematum*, *Insuetudinis* & *Adsvetudinis*. Non licet in verbis argutari; intelligemur statim melius, si *Insuetudinem*, *mollitiei* nomine declaraverimus. Certe quantum damni *mollities*, i. e. insuetudo ad *activitates*, tam *vitales*, quam *animales* seu *voluntarias*, alacriter suscipiendas, & tam corporis *agilitatem*, quam animi *activitatem* ita exercendas, imo habilitandas, quantum, inquam, hæc passim detrimenti, confusionis, perturbationis, objiciat, non tam directè corpori, quam *regimini*, *actuationi* & *administrationi* ejusdem, vix quenquam potest fallere.

#### XL II.

Quod autem hujusmodi *mollitiem* magna ex parte ipsi maxime *animo* imputemus, cum tamen subinde etiam sine *animi* sensibili præscitu, alterationes hujusmodi, ab insuetudine evenire videantur; v: g: à *cibo duriore*, aut aliàs *insolito*, etiam cum qualicunque appetitu adsumpto, qui tamen deinde plurimum incommodorum atquè turbarum circa ventriculum & primas vias, concitare observatur: Est omnino



nino harum rerum præcipuum fundamentum in eo positum, quod non solum etiam tales *tolerandi* difficultates, communissimè à *posteriori aversionem nauseosam* post se trahant; quæ, etiam antequam ullus contactus verè corporeus, cum partibus verius ita onerandis obtingat, è nudo *adspectu*, imò è multa *mentionè* aut *recordatione*, mox denuò sese exserit: sed etiam, à *priori* frivolæ tales *aversiones* æquè, ac alibi alienissimarum rerum etiam *appetitus*, passim excitari observentur a nuda falsa *æstimatione* ipsius matris, qua hujusmodi pravæ *aversiones*, aut *concupiscentiæ*, & eo ipso *tolerantia* alieniorum, aut *impatientia* etiam tolerabilium, *animo* certe infantis, tanquam ficta atquè vana res, necusquam *physice* subsistens, ita imprimitur & conciliatur.

XLIII

Coeterum, in multis etiam adhuc aliis hujusmodi variæ *impatientiæ* objectis, de rerum *non-naturalium* censu, fere tanto luculentius elucescit *animi* aberrantis concursus imò culpa; nempe vana, *impatiens*, aut *timida*, *æstimatio*, v: g: *frigoris* aut *caloris*: *saporum*, *acidi*, *austeri*, *acerbi*, & imprimis *amari*: *motuum corporis* paulo laboriosiorum, & *fictæ* inde ingentis *fatigationis*, *lassitudinis*, imo *virium* defectus: *torporis* atquè *somnolentiæ*, *vigilandi*, & *erigilandi*, *impatientissimæ* *aversionis*. Quin, etiam passim observanda, illa *superstitiosa meticulositas*, tam circa *quantitatem*, quam *qualitatem* variarum alimentosarum rerum, adeoque ingens, imo unica propemodum, *fiducia*, in perpetuis *medicationibus* præservatoriis. Qualia inquam, omnia atque singula, quantum innitantur *moralibus animorum* ipforum, præoccupationibus atque perversionibus, passim videre est in exemplis intempestivæ *indulgentiæ*, qua junior ætas enervatur. Ubi magnus exemplorum numerus satis demonstrat, quod, si hujusmodi molliculi, post hac in tales temporum & locorum vicissitudines devolvantur, in quibus affectatis illorum querimoniis locus non detur, quod tunc affatim, victo per necessitatem *molli* animi nisu, possint, & satis citò discant ac advescant, *tolerare*, quæ an-

te



tè hac non tam *animi*, quam totius corporis *vitio*, *defectu* & *imbecillitate*, minimè potuisse, videri volebant, imò solebant.

XLIV.

Quantum usquam fieri potest, vitanda meritò est hujusmodi *mollitiei*, seu *insuetudinis*, introductio; dum non solum ipsum *animum* pervertit, *meticulosum*, *lubricum*, sibi & aliis *diffidentem*, & in affectata *commoditate*, sibi aliisque incommodum & molestum, efficit, ac efformat: sed etiam ipsum *corpus*, *laxum*, *fluxum*, *instabile*, & *inhabile* reddit. Imo verò, ubi etiam jam inauspicatò præstò est, non nisi cum omni prudentia ipsi etiam indulgendum venit, ita, ut quantum usquam fieri potest, plus ipsi detrahatur, quam ultrà concedatur.

XLV.

Alterum merito ad *æstimatorias patheticas phantasias*, tam *cogitabundas* quam *appetitivas*, aut *nauseabundas*, referendum hujus classis scandalum, versatur circa *Adsvetudines*: ita, ut omnino etiam illarum rationem eximiam habere, passim necesse sit. Quæ res maximè locum habet, in præcavendo repentino transitu ab uno veluti extremo ad alterum, tum etiam in ipsa tolerantia diversarum rerum, aliàs minus ordinariè usitatarum, seu usu familiarium redditarum; quales proinde, sub hac conditione existentes, secundum habitum illarum *absolutum* seu simplicem, judicare velle, absolum utique fuerit. Quorsum nempe tum repetenda sunt ea, quæ suprà de *victu duriore* jam monuimus; tum quæ etiam de *frigoris*, majore aut minore patientia, tum etiam *fatigationis* à voluntariis motibus, diversitate, ibidem indicavimus. Hoc autem omni modo notari meretur, & in harum rerum, veluti *criterium prædictum* adsumi, quod corpus humanum, in tota sua œconomia, *fatigationibus*, non prorsus *præcipitibus*, ac *immoderatis*, non solum satis facilè *adsvescat*, sed illas etiam satis commodè *toleret*: *Luxuriosis* autem ataxiis, qualitercunque adsvetum, certius inde & citius, pluribus aliis incommodis succumbat, & inprimis quasi præmaturè *enervetur*: ita ut hic maxime valeat vulgo usitatum illud dictum; Es finde sich im Alter wie



der/ was man in der Jugend dem Leibe zu viel gethan. Quod re vera non nisi perperam & falsò, vulgò dici etiam consuevit de *laboribus* per juventutem toleratis: cum non valeat verius, nisi de *mollitie*, imò verò *luxuria* per juventutem perperam corpori imposita: dum *laboribus*, nisi corpus planè *frangentibus*, illud potius inde à juventute verè duretur, si modo in ipsam etiam usque feriores ætatem, proportionatè & ad tolerantiam, *continuètur* potius, quam intempestiva insolita *otiosa* inertia permütetur, inprimis autem cum conjuncta plenà *victus* abundantia, aut *iracundia*, vel etiam *mæroris*, *solicitudinis*, & *curarum anxiarum*, perturbationibus.

#### XLVI.

Coeterum, habent utiquè etiam illa veluti crassiora *animi pathemata*, multam atquè magnam vim, sanitatem concutiendi; unde regimine etiam ipsorum prudente opus omninò esse, nemo non meminerit. Ubi tamen inprimis *iracundia*, *terror* atquè *timor*, multarum atquè variarum turbarum authores promptissimè sientes, tanto magis in meliorem ordinem redigi postulant. Quæ res præcipuum locum habet in ipsa *mox infantum* educatione ut à *terrore* & promiscuo *timore*, *nausea* etiam, & *malacia* delicata aut luxuriosa, quantum unquam fieri potest, alieniores reddantur: siquidem hæc morum ipsorum formatio, multiplicem certè usum imposterum assequitur, tam in corporis œconomia, quam animi compositione.

#### XLVII.

Ultimo loco veniunt considerata *Excernenda*; hæc, uti duorum sunt generum, *ordinaria*, & *extraordinaria*; ita habent omninò etiam *ordinaria* maxime primum locum, ut nempè in ipso quoquè adhuc *sano statu*, corpus ab *alienis*, imò vel ipsis *superfluis* ac *emeritis*, satis maturè repurgetur. Sunt hæc talia *Excernenda*, ante omnia *alvinæ feces*, de ciborum *furfuribus*, & *crassis* portionibus; deinde *Urina*, *salinarum* maxime *portionum* & *salino-sulphurearum*, expurgationi tribuenda, Deniquè *halituosa* etiam *effluvia*.



bus partim tenuis *humiditas* ferosa, partim valde activæ & agiles, adeoque ad *divaporationem* maxime habiles, *salino sulphureæ fermentescentes & orgasticæ* portiones; in auras expelluntur. Ubi prima crassissima *excrementitia* substantia, *fecum* alvinarum, si ultra tempus conveniens detinetur, pro reliqua individui *sensibilitate* variante, variis etiam incommodis occasionem præbet. Ad minimum, & ferè familiarissimè, trahit post sese retentio talis ultra tempus conveniens, partim fecum ipsarum insolitam *siccescentiam*, & indurationem; deinde etiam *motus excretorii torporem* & segnitiam: porrò, quando deinde quasi per vim institui debet elisio, facessit negotium tum extremitati *intestini recti*, ut sæpe etiam *sanguinis* expressio, ita una inducatur: & ipso aliquando fortissimo nisu, alias insuper individuales malas dispositiones excitat, & velut in actum deducit: (quod non solum de *herniosis*, quin etiam *hæmoptycis* aliquando valet, sed etiam de ipsis *gravidis*, quibus talem constitutionem aliquando ad abortum veluti primam occasionem præbere, non insolitum est,)

#### XLVIII.

Præbetur autem huic etiam rei occasio, *segnitiei* inquam, imò *occlusioni* debiti successus alvini, Primò, & simplicissima propemodum ratione, per ingentem *desidiam*; unde familiare est, ut sub profectionibus longinquioribus, veredis cursoriis susceptis, ubi per 3. 4. dies & noctes cursus, non nisi per intervalla horæ spatiis iuterpositis, tanquam per oblivionem, sub commoditatis etiam defectu, alvus detineatur: quin etiam *sedentario* segni otio addictis, aliquando e simplici *neglectu*, & levium alvi monitorum contemptu, illa deinde magis magisque stipatur atque restitat. Deinde fovet plurimum hanc alvi intemperiem, *potus* nimia *paucitas*; inprimis sub *solidiorum* ciborum largiore usu, & antè omnia *siccescentium*, & humiditatem promptius imbibentium: qua de re valet dicterium illud *Avicennæ*, juxtà vulgarem versionem, *omnis oppletio mala, panis autem pessima.*  
(quam



(quam vis peritior aliquis Arabismi, errorcm interpretis hic accuset, & locum illum non de *oppletionē*, sed de *inappetentia* loqui, asserat.) Ut nihil dicamus de eduliis etiam actualis *adstrictorie* efficaciatē compotibus, *pyris* siccis, *castaneis* crudis &c: Maximè verò omnium vitanda venit *voluntaria*, & sœpè quasi coacta & contendens, alvi admonentis *repressio*; ut pote quæ pertinaces, non tam siccitates, quam *stricturas* alvi, post se trahere potest: imo aliquando altiores *spasmos colicos* exitare: præsentissimè omnium in subjectis quæ *flatulentia* etiam familiariter obnoxia sunt.

XLIX.

URINÆ defectus, non adeo ordinariè fere, & familiariter occurrunt, ad minimum ita eminenter, ut eximiè sensus feriant, aut præsentiora incommoda objiciant. Qui tamen vel aliis largioribus potibus, inprimis aquosis, vel ipsi simplici aquæ, cum *Thee* aut *Caffè*, & valdè largis inprimis, potationibus addicti, tamen plane nihil *proportionatam* Urinæ missionem experiuntur, illi habent omnino, quod considerent, ne sensim majora incommoda ipsis ingruant. Quid quod etiam *consistentia* Urinæ nimio *tenuior*, aut perpetuò *crudior*, intimiorum secretionum ataxias prodat, adeoque vigilantiam, tam pro ordinanda *Dieta*, quam altiore scrutinio latentium causarum, commendet.

L.

SUDORIS regimen conveniens, postulat etiam aliquam attentionem; dum fere vulgo, sub quantalibet etiam reliqua *euphoria*, jam per *impatientiam*, jam per alias intempestivas *solicitudines*, *sudationes* promptæ, aut planæ interdum *spontaneæ*, sub opinione *debilitatis*, jam antecedentis, jam subsequæ, metuuntur, atque præjudicio arguuntur: aut ad minimum peculiaris *molestiæ* nomine, cohibendi potiùs, atque *supprimendi* reputantur: quod tamen nunquam satis commodè, facillimè verò quam maxime incommodè cedit. Habent autem ante omnia sub hac consideratione, peculiarem planè locum, *sudores anniversarii*, alterutro, inprimis *autumnali*,



*tumnali*, aut utroque etiam, *æquinoctio* concurrantes: non promiscui æque, sed, planè peculiari ratione, *matutino* tempore, post digestionem atque distributionem absolutam, (ad-  
eoque justiore tempore excretionis quam vocant tertiæ cocti-  
onis,) sese exferentes, spontaneo proventu. In his certè oc-  
currit tanquam specimen aliquod perversi judicii hominum;  
dum familiariter hos sudores metuunt imò averfantur; dum  
potius, hi quidem *rectè* atque *commode* succedentes, nihil us-  
quam periculi corpori machinantur: si verò potius *impedian-  
tur*, aut ipsis resistatur, inprimis præmatùrius, antequam  
sese exonerandi occasionem assecuti sint, tunc maximè Pati-  
entibus impendent alia, & maximè omnium quidem *artbri-  
todea* incommoda. Unde præstat hujusmodi sudoribus in  
tantum indulgere, ut quidem à *positivâ promotione*, seu  
quoquo modo majore *incitatione*, temperetur; Interim per  
*medicamenta* quidem minimè omnium, imò ne quidem per  
*refrigerationes* qualescunque, aut præmaturam lecti omisso-  
nem, etiam inhibeantur. Ita sensim spontè *imminuti*, tan-  
dem planè cessant, manifestiorem *alacritatem* corpori relin-  
quentes, minimè verò ulla alia ulteriora incommoda. Qua-  
rum omnium rerum contrarium evenit, quando *intempesti-  
vè* reprimuntur.

LI.

Quamlibet autem etiam in *occasionibus* sudandi, modum  
servare quam maximè conveniat; venit tamen hic inprimis in  
considerationem, tum reliqui *habitus* corporis, tum *adsuetu-  
dinis*, atque *tolerantiæ*, sudationis diversitas: Ubi multigra-  
*ciliores* non solum *promptissimè* æquè ac *largissimè*, sudant:  
Verum etiam nulla inde incommoda persentiscunt: dum ex  
adverso, plerique *habitiores*, vel parcius sudant, vel sudatio-  
nem præter modum molestè ferunt, impatientiâ ad minimum  
& fastidio insigni. Coeterum autem, *reparatur* omninò fa-  
cilius jactura humiditatis, quæ per sudationem amittitur; (ni-  
si quidem prorsus enormi commotione excedens, alia damna  
& colliquationes introducat:) *solis potulentis* humoribus: &  
tole-



toleratur proinde etiam facilius, etiam diutius, non *nimis impetuose*, durans, vel etiam sæpius *repetita*, dummodo potus subsidium rectè adhibeatur.

LII.

Aliæ evacuationes *extraordinariæ* ut in viris hæmorrhoidales, in foeminis autem, per periodum certam ætatis, *menstruæ*, servari utique debent in legitimis suis successibus: *Fœminina* quidem, quamdiu infantem neque *gestant*, neque *nutriunt*, etiam absolutè: *masculina* illa vero, postquam diutius *adsuevit*, aut diu *molita*, tandem erupit, *toleranda*. Uti que est *sub conditione*: nempe *Primo*, Quando tranquillissimè *compensari* aliis evacuationum modis non potest; *Secundo*, quando *pericula*, nudam ejus *cohibitionem* insectantia, nequè securè præoccupari possunt, neque ubi in actum deducta sunt, sub *certitudine* aliqua *percurari* & in integrum restitui: de quibus utrisque rebus quid sperandum sit, nemo utique intelligit, nisi *periti præctici*, peculiariter inquam, hujus negotii indolem, & *artis* circa illud *potestatem* edocti.

LIII.

Quid, quod etiam aliarum, quasi negligentius *adsuetarum*, *sanguinis evacuationum*, ingens ad conservandam sanitatem, & avertendas impofterum hinc pullulantes periclitationes morbidas, haberi debeat ratio. Ubi numerosissima certè occurrunt exempla, adolescentum atque juvenum, qui per æstivos menses non *frequentissimis* solum atque *promptissimis*, sed etiam *largissimis*, *narium hæmorrhagiis*, diu obnoxii; quamdiu hæc ita liberè imò verò liberaliter, revertuntur, atque succedunt, nullum incommodum, præter molestiam nudam, inde experiuntur. *Cessantibus* autem his, aut planè vi aliqua *cohibitis*, *dolores* & perturbationes *capitis*, *Vertigines*, *Odontalgias*, *Anginas*, *Gravedines*, jam *aridas*, jam *acres*, jam *contumaces* atque *diuturnas*, imò vel *habituales*, incurrunt: aut *Arthritodea* varia incommoda.

LIV.

Illud unum adhuc adjicimus, quod illi, qui etiam *ar-*



*bitrariis* evacuationibus Sangvinis per V. S. assueverunt, cave-  
re debeant, ne iisdem *temerè* renuncient: & quidem non so-  
lùm *media* adhuc, sed ne quidem ipsa *proveciore* ætate: adeò,  
ut neque *septuagesimus* annus certum limitem hic constan-  
ter constituere possit, si reliquus corporis qualiscunque *vigor*,  
imo vel solum *tolerantia* probabilis, adhuc præsto sit: Cum  
certissimum alias sit, quod non solum aliæ frequentiores, imò  
magis magisque etiam assiduæ, molestiæ, sed sensim etiam, imò  
variis modis, *periculosa* confectaria, certò hinc ingruant.  
Unde tales Patientes post hac non solum perpetuis *valetudi-  
nis* suæ incommodis, sed insuper etiam pro *consiliis* & *auxili-  
is*, merè *palliatis*, & magis magisque etiam ad hunc scopum  
*irritis*, perpetuæ *contribuendi* necessitati, obnoxii evadunt.  
Quod iterum iterumque serio commendamus, non tumultua-  
riæ, sed multis modis circumspectæ, & solertissimæ observa-  
tioni, experientiæ invigilanti. Quod quidem etiam de *Cu-  
curbitularum scarificatarum*, *Fonticulorum*, imò diutissime  
apertorum etiam *fortuitorum ulcerum*, prudente tractatione  
in ordine ad nudam *abolitionem*, intellectum volumus.

LV.

Sicut itaque, per dicta, *Dieta*, in primis omnium rerum  
*non-naturalium* maximè verò *simpliciorum* & quasi absolute  
*necessariarum*, modum justum atque moderationem invol-  
vit; in primis autem *Assumendorum*, proxime *motuum* ala-  
criorum, dehinc *Animi Pathematum* & ultimo *Excretionum*,  
& harum maximè intuitu, *Frigoris* immoderationis: Ita ab-  
solvit eandem plenius, servanda æstimatio, ut, quæcunque  
*emollire* possunt corpus aut animum, aut *ordinem* agendorum  
repentè *intervenire*, aut præposterè evertere, evitentur: Po-  
tius autem parsimonix atque simplicitati in *Adsumendis*: *to-  
lerantiæ* verò & activitati in *agendis*, corpus & animus ad-  
suefiant. Sicuti certe ita *Consuetudo* illa minùs convenienti-  
um rerum, quæ tamen denique, vel ex improvviso fatiscit, non  
magni facienda, licet neque repentino pavore timenda sit: Ta-  
lium



lium autem rerum, quæ *firmare* potius corpus, & animum stabilire possunt, *Adſuetudo*, omninò ut laudabilis haberi, imò moderatè atque ordinatè quæri, ac illi opera dari poteſt:

LVI.

Hæc de *universaliori Dieta*, ad inſtituti noſtri rationem dicta, ſufficere poſſunt; dum de *ſingularibus* ejusdem proportionibus, ad *peculiares* corporis alias diſpoſitiones, non ſolum *extraordinarias*, ſed etiam planè *morbidas*, ſingulatim verba facere, temporis noſtri ratio non permittit. Si tamen etiam hæc ipſa à nobis ita tradita, decenter applicentur, ad quaslibet *ſpeciales* occaſiones; nempe, ut non ſolum *ſimplicitas* in qualitate, & *moderatio* in quantitate, ſed & imprimis *tolerantia*, tam ab æſtimatione *à priori*, quam à ſenſu & experimento *à poſteriori*, pro regula aſſumatur atque retineatur, nullum proſectò uſquam remanebit dubium, quin ex hac etiam *generalione* commentatione, utiliſſima *applicatio* ad ſpecies fieri poſſit.

LVII.

Supereſt autem illud unicum, omni utique prudente conſideratione atque æſtimatione digniſſimum, quod bona *Dieta*, Medicis quidem ſubſidiis, accenſeri ſeu *ſubordinari* atque in ſubſidium ſubrogari, paſſim debeat; Imò etiam in multis, neque quidem poſtremæ aut leviſſimæ periclitationis, etiam dubiis ſanitatis inclinationibus, (ut de actualibus *morbis* nihil dicamus,) ita attemperari, ut etiam *ſine artis ope*, œconomia corporis in juſtum ſuum ordinem ita reſtituatur: viſſim autem enormia, cum primis autem repentina, *Diætæ vitia*, non ſolum in corpore ſano tantas læſiones producere poſſint, ut *medicamenta*, illas vix, aut tardiſſimè, revocare valeant: ſed in ipſis etiam morbis, tot atque tantas paſſim turbas edere, quas etiam *nulla ars* reparare poſſit. Nedum, quod in primis malæ *adſuetudines* Diæteticæ, ejus utique ſint indolis, ut etiam inſolitum nulla *arte* compenſari valeant. Quod ipſum, cum ita omnino ſe habeat, facilè indè liquere poteſt, quantæ dignitatis ſit juſta conſideratio DIÆTÆ, & quam  
pru-



prudenter tam *præservatorio* scopo, prudente consilio, passim Patientibus commendanda: quàm in ipsis *curationibus*, etiam ad morbi, imò Naturæ, genium, utilissimè attemperanda: ut ita veritas elucescat antiqui illius effati, non postremi inter principes Medicos: *Multi magni morbi curantur Abstinencia & Quietè.*

S. D. G.



Vita, Dies, Virtus, Pietas dant præmia multa  
 Quum solers animus cuncta beata capit;  
 Ast quis non tribuat plausus de munere magno  
 Quod Deus atque dies jam TIBI constituit.

Ita brevibus Honoratissimo Domino  
Candidato applaudit.

D. MICHAEL ALBERTI.



**A** Rdua quando Tibi confertur cura medendi.  
Det multis possis utilis esse Deus!  
In Te fit medico, semper, carissime TOTTIN,  
Præsentem languens experiatur opem!  
Quod deest arti medicæ compenset IHOVAH!  
Frustra sic æger non petet artis opus.

D. CHRISTIANUS FRIDERICUS Richter  
Med. Pract.



GEORGII ERNESTI STAHLII,  
MED. DOCT. AC PROF. PUBL. ORDIN.  
*PROPEMPTICON IN AUGURALE*  
DE  
CASIBUS MEDICIS  
PRACTICIS.



FOR THE FIRST TIME  
AND FOR THE FIRST TIME  
PRACTICE  
OF  
ASTHMA MEDICIS





Ntiqua illa assertio, imò sacra, *Nihil novum fieri sub sole*, quantumlibet aliena interpretatione velut in dubium adduci posse videri queat, certè tamen, si vel paulo laxiùs sumatur, aut, abstrahendo à purè *artificialibus* effectibus, de his potius, quæ *natura*, & mentis propensione simpliciore,

perpetrantur, tæetur omninò dignitatem suam, ut passim quidem *aliter* aliquid fieri, sed non *aliud*, rem exquisitiùs perpendentibus, satis dilucescat. Quamvis autem etiam res *artificiosas* ex aliqua parte bono jure excipiamus, minime tamen illæ quoque ita simpliciter eximendæ sunt ab hoc censu, quin passim satis clarè appareat, quod etiam *artificiosæ* res non omnes totæ quasi primò *prodire*, sed nudis *schematismis* variatis, denuò *redire*, agnosci possint potius, quàm verè simpliciter novæ emergere. In rerum certè *materialium* republica, quæ secundum magnam illam *σύστασιν*, mutuis concursibus, successibus, cooperationibus, velut in scenam prodeunt, valet hoc certissimè, quod nusquam sincerè *prodeant*, ut *novæ*, sed *redeant* solùm, ut *de novo*. Et licet harum aliquæ etiam revera *rarò* obtingant, comparatis tamen inter se antiquis monumentis, satis passim dilucescat, quod etiam jam à priscis temporibus eadem facta sint, aut planè hæc ipsa fuerint, sed inventa solùm feriùs, aut animadversa, *videantur* hoc respectu *nova*. Ut à generali latissimo ambitu, ad arctiorem complexum nos recipiamus, sumemus nobis, tanquam



specimen aliquod, vulgò ita nominatos *Casus Medicos Practicos*. Usitatum valdè est Doctoribus, ut collegia etiam tota, Philiatris proponant, *Casuum* Medicorum; minime contemnendo studio atque scopo, nec ita quidem ullo modo injusta appellandi ratione: cum utique imperitis, aut nondum satis exercitatis, etiam illa *nova* videri necesse sit, quæ vel quotidie passim eveniunt: Pro qualibus eò melius excitandis & exercendis, omni modo longè aptissima est illa methodus, ut ipsis *Historie morborum*, ea ratione proponantur, ut tanquam in rem præsentem adducti, sine præjudicio interim tertii, nempe Patientis, moram non sine periculo laturi, confiderent securius, speculentur, imo agnoscant, quid è circumstantiis eliciendum, quid primo, quid posteriore loco, attendendum, quis primarius, quis secundarius affectus sit. Interim, cum in his etiam rebus offensio obtingere possit, quam evitare non magis utile sit, quam necessarium, placet propterea de hac re aliquid proferre. Ante omnia videlicet fervendam puto, jure meritoque discretionem illam, quid simplicis *historie* morborum nomine, & nihil coacta *enarratione*, dignius esse, & longe commodius ita tradi atque doceri possit: quid verò contra, tanquam ex involuto quodam complexu eliciendum, proponere atque sistere, expedire possit: & quibus maximè res tales ita proponi commodissimè debeant. Hòc enim modò inservit demum, *exercendis ingeniis*, methodus *casus* proponendi, quando *historias* morborum directas atque simplices, ante omnia rectissimè cognitatas habent; ut ita inter varias concurrentes fortè *accidentales* circumstantias, tanquam enucleare & dijudicare discant, quid directè, quid per indirectum, quid *primario*, quid *secundario* & ut ex accidenti, fieri aut subesse agnoscendum sit: ut ita verum morbum dignoscere, & ad illum intentiones suas dirigere possint. Quando verò perversa methodo negotium geritur, ut *involuti* quasi, *complicati* præcipuè magis, quàm *comitati*, affectus, talibus sistantur, qui singulorum veram & exactam indolem nondum intelligunt; frustra etiam esse omnem spem boni usus, tanquam in propatulo esse arbitror. Deinde verò,  
& tan-



& tanquam *secundo loco*, pessundat sæpenumero certe, usum *casuum* ita narrandorum, illud ingens præjudicium, quod Medicina hodierna nimis aliena sit à cognitione & prudentissima æstimatione *decursum & eventuum morborum*, prout illi, etiam sine omni positivo adjumento artis, ipsius *Naturæ* energia, ita in ordinem coguntur, ut illis superatis, œconomia corporis suæ integritati restituatur. Qualibus methodis, mediis, viis, eventibus, hæc omnia procedant? Quid vero etiam *ars* verè & sincerè hic possit, ab his naturæ methodis re vera diversum, *melius*, inquam, illis, & ante omnia *paratius*. Ubi nempe, *tertiò*, cum *casus* tales, communiter ut in ordine ad *Therapiam*, producantur; nisi benè discernatur, quid à naturæ potestate, quid ab *artis* præsidiis, sperandum veniat, non potest unquam casus talis solidè resolvi, nisi morbus, non ut in casu præsentē sese offerat: sed ut in sua indole sese gerere jam certum esse debet, quò recte judicari, aut ad methodum medendi convenientem applicari, possit. Unde quidem, *quartò*, illud, quod *casibus* hujusmodi, si non simpliciter finguntur, sed è verâ observatione memorantur, multum certe difficultatis injicit, est sæpenumero ipsa, alibi prægressa, alibi concurrens, *heteroclitica tractatio artificialis*: Ubi deinde fieri non potest, quin veræ indoli morborum, ut *in se* existere deberent, varia præjudicia eveniant, ex insolitis phænomenis, per *inconditam tractationem* demum introductis: quæ sæpenumerò non magis dignotionis promptitudinem morari, quam ipsum etiam morbum, ejusque justum & legitimum obsequium ad justam quoque curationem, variè disponere possunt. Unde, si deinde tales *casus*, ad finem usque enarrentur, rerum recte *peritis*, veluti in sensus incurrat, quod non tam *morbi*, quam *inconditæ curationis*, ille *casus* habendus, pessimè certè paradigmatis loco, ad imitationem proferatur. Cæterum autem, *quintò*, hujusmodi *casus*, scriptis, directe & simpliciter *didacticis*, inferere, quæ aliqui pro usu tanquam particulari, *discendi* & sese *exercendi*, usurpare debeant, minimè justum est, & æquum. Interim, uti tales res etiam veluti semper denuò recoquere, certè odiosè supervacuum est, (loquor autem de publicis enar-



rationibus ; ) ita tantò magis ineptum certe est, hujusmodi res non tam è *media* potius *quotidiana praxi* arcessere & ad illam provocare: quam ex aliquot Authoribus similes historiolas conquirere, & prolixè, non allegare, sed transcribere. Sicut enim certè stupidè stolidà esset ambitio, ex hujusmodi industria, prolixæ *eruditionis* existimationem aucupari: cum *Moroni* Directorium, *Lipenii* Bibliotheca, *A. N. C.* cum operosis passim suis *scholiis*, ne Tironibus quidem amplius tam parum nota sint, quin notissimum habeant, quod ad istorum ductum & indicia, nulla ulteriore *arte*, sed solo *otio*, & describendi *patientia*, opus sit: quibus subsidiis suppetentibus, etiam inertissimus de reliquo quilibet, hujusmodi res confarcinare possit. Quod autem ad *rariores* casus attinet, servandum certè etiam circa illos est prudentissimum judicium, ne vel contrario usui adhibeantur, nempe *ordinariis* morborum historiis stabiliendis: vel ex adverso, tanquam peculiari commemoratione digna reputentur, & tanquam *rariores*, æstimentur, talia, quæ potius ex *universali Experientia*, vere innumerabilium exemplorum quotidianorum, & vulgo quoque hominum satis notorum, manifestissimè, maxime verò *simplicissimè*, citari quæ maxime possent: & insuper quidem ita demum etiam quam maxime sincera exempla exhiberent, nempe solâ *perversa* forte tractatione deformatum morborum. Difficultas summa quæ impediât, ne hujusmodi casuum pertractationes, tali decente ratione perpetuò adornentur, imò potius vel nunquam propemodum ita uti conveniebat, instruantur, est utique primò omnium, portentosa illa quidlibet, circà *historiam* æquè, atque mutuam *conspirationem morborum* opinandi, imò *fingendi*, licentia. Ex hac enim prognascitur utique versipellis illa, affectus non solum alienius interpretandi, sed omninò, per falsam præconceptam opinionem, etiam simpliciter observandi, & exquisitè *enarrandi*, alienatio: Et hinc etiam, quarumlibet potius aliarum, quam *verarum* concurrentium causarum, animadversio. E quibus interim rebus, quantum damni non solum in morborum, sed etiam curationum, per *Fallaciam Non Cause ut Cause, historiam*, ingruant damna & offendicula, &

pas-



passim etiam falsæ opiniones, de *efficacia medicamentorum & methodorum*, quando propriæ *declinationi* morbi salutarî talia adhibentur, & ita, (uti certe rectè deridet vulgus, *Das letzte hilfft* /) quod revertenti sanitati tanquam obviam missum est, illam restituisse creditur: hæc inquam facile est cordato æstimatori comprehendere. Unde quidem omnibus modis dignum esset, ut etiam hujus generis otiosæ, tanto magis autem vanæ, enarrationes, intra cancellos coërcerentur, & veritatis potius simplicitati, quam intricandis hujusmodi tricis, operam navaretur.

Differere hæc libuit per occasionem publicæ commendationis, quam à nobis postulat

**DN. JUSTUS TOTTINUS,**

Mitaviâ Curlandus.

**N**atus hic in modo nominata Ducatus Celeberrimæ Metropoli, Patre Viro Nobilissimo atque Amplissimo **DN. JUSTO TOTTINO**, Senatore urbis spectatissimo: Matre virtutibus sexum suum ornantibus laudatissima, **ANNA MARGARETHA Windhorstin** / honestissimi viri mercatorii ordinis filia. Ab his Parentibus optimis, non solum ad optimos mores ab ipsis cunis, post pietatis studium, sollicitè formatus, sed etiam optimis studiis dicatus atque destinatus a puero, privatorum Informatorum curæ præcipuè commendatus est: Adultior autem jam Scholæ Publicæ Celebri hujus urbis commissus. Tandem Anno 1700. Thorunium transmissus, florenti ibi adhuc Gymnasio adscriptus, philosophicas disciplinas coluit: Post biennium Regiomontum profectus, per anni forte spatium, Jurium studio animum applicuit. Proximo autem anno ad Illustrissimam hanc Regiam Fridericianam transmissus, mutato, cum Charissimorum tamen Parentum consensu, & Amicorum prudentum svasu, proposito, Medicam Artem comprehendere aggressus est. Eumque in finem Excellentissimi **DN. D. HOFFMANNI** quidem Collegium Experimentale Physicum Curiosum, & Commentationes atque Præmonstrationes



nes *Materiæ Medicæ* audivit: Mea vero Collegia Anatomico-Physiologicum, Pathologicum, Practicum repetitum, Chirurgicum, & Chymicum, omni cum industria percepit. Privatam etiam instructionem suscepit ab Experientissimo DN. D. GOHLIO, qui ipsi dictatas quondam a me Theses in omnes partes *Medicæ Doctrinæ*, vulgo *Cursum Medicum* vocant, diligenter explanavit. Præterea verò publicè etiam laudat benevolentiam atque facilitatem Experientissimorum Fratrum DNN. RICHTERORUM, *Medicinæ Doctorum*: qui non solum ad Collegium Practicum privatus olim habitum, sed etiam in Officinam Pharmaceuticam Orphanotrophæi instructissimam aditum, ipsi liberum concesserint: Quin etiam comitem ad visitandos ægros bene numerosos, passim adsciverint, unde clinicam morborum historiam comprehendendi, optimam occasionem obtinuerit. Tandem Anno 1707. in patriam reversus, & ibi quoque ad praxin, quantum occasio ferebat, attentus, annuo propemodum spatio, cum bonos, assistente DEO, successus experiretur, hortantibus propinquis ad proseguendam serio ipsam praxin converso animo, Honores etiam & Immunitates in Arte Summas adsequi animo proposuit. Reversus ita ad nos, Facultati nostræ desiderium hoc suum decenter aperuit, cumque nulla esset causa quamobrem ipsi deesse deberemus, aditum ad consveta examina merito impetravit. In quibus cum profectuum suorum laudabiles exhibuerit fructus, meritò ipsi ultimi etiam speciminis publici Inauguralis potestatem fecimus, hoc cum editurus sit Disputatione solenni, de DIÆTA, proximis Calendis Sept. ad hunc Actum Solennem SERENISSIMUM PRINCEPEM SAXONIÆ Magnif. Pro-Rectorem, reliquosque Illustrissimos, Illustres, Maxime Reverendos, Excellentissimos, Generosissimos, Nobilissimos atque Doctissimos, Academiae nostræ Proceres, Fautores, Cives, pro officii ratione, cum omni honore debito atque observantia invitamus. P. P. Dat. Halæ Magdeburg. die XXVI. Augusti, MDCCIIIX.

(L. S.)